

壽光縣誌
(民國)
一



ISBN 988-978-316-9



二〇〇六年三月

中國海疆舊方志

選題組織策劃：蝠池書院出版有限公司

發行者：蝠池書院出版有限公司

出版者：蝠池書院出版有限公司

香港九龍旺角花園街二十六號好景商業中心二十三樓二三〇九室

電話：〇〇八五二一六五五九二三七〇

傳真：〇〇八五二一二三八八七九〇〇

定價：人民幣 九五〇〇〇元（全書共三百一冊）

壽光縣志

民國二十五年秋青島市
濰縣路宜今印務局承印

序

近世稱志書之善者首桐城吳摯甫先生深州風土志先生爲當代文宗嘗刺深有惠愛而尤惓惓於深之人物文獻者也秉其素所蓄積施爲一一筆之於書肫切若親披案牘時實邁出古今著作之林以退休之吏衡量文事與士民往還類家人父子自來修志如斯故實殆未可一二數也吾嘗心儀其人壽光今奉令纂修縣志余以行政叢脞無暇親炙研席枕肱文史延邦人士開局集事公議所在皆主敦請前令鄒君心一總其成鄒君以名孝廉兼政事文學之選又前欲提創修志而未及爲者深重父老殷殷之

意惠然戾止話舊之餘商榷體例覲遐揆邇析合萃離組經緯
亦因亦創視吳先生不能修志於在官之日而能補成於去職之
後其爲韻事正同余旣欣志書之有託也又以鄒君爲政久邑人
所繫念地方利病洞悉癥痼必有以益我者尤心焉嚮往之余以
爲志書乃政書也周禮地官大司徒首重建邦土地之圖設土訓
掌道地圖以詔地事設誦訓掌道方志以詔觀事爲今縣志之權
輿皆土會土宜土均之法及保息養民本俗安民鄉三物教民之
所本而爲鄉大夫州長黨正之職所不能外其爲用固如是也今
之修志地理沿革古蹟金石人物有關於考古者考証旣明皆一

成而不變而國體方更建設正繁其於政治有關於証今者則方興而未艾是於考古爲結束於証今爲開始余職司行政惟汲汲於政治得所從適之途求借鑑之資已耳鄒君旣深以余言爲然又遜挹以離任幾近十年前此當戎事倥傯人民日處於水深火熱曾無所補救於其間今茲重來見夫道路修整交通利便公廨煥新監獄改善迥異舊觀以爲治蹟燦然大進入於正軌深致慨慕是固功令所督迫上計所期會積漸以成耳余何敢據爲聖飾焉而環顧四境農村凋敝工業不振商賈蕭疏民間疾苦殆倍於曩昔杼柚其空曷勝詩人大東之歎今試一讀新志民生未輯何

以輯之地利未興何以興之教育未普何以普之物產未裕何以裕之風化未淳何以淳之恐後此未盡之責猶復重如邱山政治改進本非可一蹴而及也亦非一手一足胼胝所能幾也有程序繼續之功焉時乎俶擾則拊循噢咻之爲急時乎安定則富庶教養所當先前人奠後人之基後人繼前人之緒苟有志於利濟其操心積慮未嘗不同也昔令尹子文舊令尹之政必以告新令尹余得與鄒君上下其議論鄒君迺深慨今時爲政萬端待舉而民窮財盡措施實難必權衡緩急調劑盈虛事舉而民不擾乃爲善政其言尤惻惻無華余猶憶吳摯甫先生送某令序有云不可於

上而守吾法不可於法而利吾民不可於民而行吾志與吾學又云吾所謂不可非眞不可也吾方字之而若棄之吾方恢之而若虧之彼不知吾之字且恢也而見以爲棄虧則不可於意矣是亦申論語未信則民以爲厲已之說也不綦難哉不綦難哉志例鄒君敍之詳矣余不復贅惟著吾二人所論爲政艱苦之言質之國人靳有以共諒之云

民國二十四年七月壽光縣長荷澤宋憲章序

序

壽光縣志自清嘉慶迄今失修凡百有餘年邑人慮掌故就湮典章莫續方謀集事值政府有督修之命遂規畫從事編纂邀余預其役余惟修志一事恆視舊志以爲衡舊志誠善成規具在亦步亦趨斷代爲史續之斯可耳擅議更張非庸卽妄才學識三長未必過前人祇貽蚍蜉不自量之譏其或體例外違考證疏誤純駁互見詳略異宜主持非方聞碩士有乖於大雅未足信今傳後者正賴後賢補苴缺憾整理之斯可耳志書本一方之史實不難於因而難於創若夫因仍有創創仍有因則紛紜錯綜條理爲尤難

自惟有準今酌古出於重修之一途方今民國肇基號爲共和行政歷代政體不容於今而國民政府統一以三民主義建國視民元十七年來革命事業未符所期體國經野維新是圖叛赤縣神州未有之遐矩事不承前遑論清代際此玄黃嬗化而欲珥筆納文物於一軌鑿柄不入有必然者一縣之政與國響應如桴鼓名實旣異載籍斯繁不別爲發凡起例將無以同條共貫勢須舊者還其爲舊新者著其爲新時代不相淆而大易革故鼎新之義見焉在昔記事如司馬遷之於史記志典禮如杜佑馬端臨鄭樵之於通典通考通志上下數千年而沿革秩然綱舉目張以御之有

法故也章實齋有言前志無憾則但當續其所有前志有闕則但當補其所無又言修志者非示美觀將求其實用也時殊事異舊志不能兼賅則事雖遞修而義同創造矧夫國體變更如今者非復殷因夏禮周因殷禮損益之間有出於孔子所言百世之外者哉茲按壽光嘉慶劉翰周舊志合康熙三十七年安致遠志乾隆二十年王椿志二者彙而重修大體臻善於斟酌之辨獨詳嘗評安志高潔有餘而體例未備王志體例仍舊而識見未闕顧沿革古蹟河泊諸門考證亦有疏略山東續考古錄新山東通志已多所糾正藝文志搜羅未備金石一門且付缺如大事編年表多屬

歷代要政非僅災異乃載於食貨與田賦同列爲例不純不無可
議是不獨於今應創造於古亦應整理於是按時訂例以前清變
法前爲一期變法後爲一期入民國以國民政府成立前爲一期
國民政府成立後爲一期增葺故實隨國是爲轉移此皆未能盡
循舊志者也余前承乏邑令本有志提倡踵修以時局搶攘佳苻
未靖方措注於勞來安集未遑以爲歲丙寅邑人崔君翰卿趙君
東甫步君筱蓬等咸注意及此徵文考獻費時逾歲舉百年來舊
聞裒然成冊儲材已大備茲焉開局經縣長宋君斌甫監同邑人
士崔淑庭劉可亭劉德石王荆門諸君子繼續前修仍必延余受

其成余學殖荒落於斯道實無補助深感諸父老不我遐棄藉以
話舊聯文字之歡補未償之願得廁名卷末爲幸而治行無似夙
無造於是邦邦人士獨備加以飾詞是則尤使余操觚傍徨而不
勝愧赧者矣是爲序

民國二十四年夏六月前壽光縣知事武昌鄒允中撰

